

AQUILÈE: L'ULTIME ARLECHINADE

Le àn clamade cussì la Messe di san Ramacul e une arlechinade efetive e jè stade, ancje se no vin nissune reson par scrupulâ che seti l'ultime. Massimamentri cumò che ur semèe di vêle inbrucjade cul latinorum. Par no contentâ nissun, i vescui «regjonâi» si son butâz cun Lefebvre e cul so latin e no si rindin cont ce tant ch'al distone a sintî une lenghe muarte in mieç a di un popul vîf.

Chest an, dongje dal latin, un'âtre delusion: la predicje stratosferiche dal Vescul di Pordenon Freschi. Nol à dit un et te lenghe di sô mari e di sô pari e de sô int e ti à inpastanade sù une predicje che podeve lâ di cane par san Gennaro e compagnie briscule. «Un clâr esenpli di predicje che no si à dirit di fâle nancje di cjocs» al à comentât rugnant plui di un.

No podìn po saltâ l'articul di fonde de solite «Voce Isontina», che no piert ocasion par dâur jù ai furlans (o amancul cussì nus semèe di capî ta chel articul tant ingredeât). *«Le lacerazioni e anche le divisioni ecclesiali, sempre latenti come aveva previsto il suo divino fondatore, hanno trovato e trovano esca proprio nella rinuncia della tradizione, nel piegarsi alle mode e nel gusto di un frazionismo acritico; tutte espressioni di una caduta verticale non solo dello spirito di fede, ma anche di un pressapochismo culturale e di un dinamismo piegato facilmente da piccoli progetti privi di respiro e dimostratisi funzionali alla conservazione»*. Là che si viôt che il siôr Boscarol al è analfabet e vuarp.

Furtune che pre Vigj Marcuç, dean di Aquilèe, ur à dit ai vescui, in non dal consei vatican e dai diriz dai popui, che finissi cheste comedie e che si fasi, une buine volte, une Messe te lenghe ch'ò vin dirit cence chesc' pastroc's.

J àn batût lis mans un biel pieç che no finivin âtri. I vescui le varan nasade che si tratave di un laut al coragjo dal dean ma ancje un sbroc di rabie e di delusion cuintri di lôr, che nus àn invidâz a vê coragjo, sul stanp dai Protetôrs dal Friûl, e lôr no àn coragjo no di dâ la vite pe lôr int, ch'al sares masse, ma di riscjâ un sbit di Messe pal popul fedêl di Ermacure e Furtunât.

Avost 1982